

寶前兩溪志畧卷五

歸安吳玉樹靈圃氏編輯

寺觀

兩溪梵宮道院可攷者始于三國盛于宋元明之際屢有變遷二氏之教雖治道弗尙然清英游集刊石留題足可增輝名勝未敢遽廢焉誌寺觀

獅子吼寺

在射村南一名南寺三國吳常泰中有居人劉鉞覩空中奇獸金毛五色哮吼之聲三振遂捨宅爲寺因以爲名唐會昌中廢太和三年重建大殿上樑時有喜鵲數千各啣木集樑中刻營成一巢而散今巢尙

寶五

一 嘉業堂校刊

存雖零落尙如車輪後殿有檀香木大士像高可丈餘鏤極精工云是吳越錢氏物 國朝順治庚子吳時亮重脩乾隆庚辰後殿被火僧法輪募緣重建

稱獅子吼鵲巢  
列入勝景

**府胡志舊聞**葉石林問于朱愷濟曰自坡翁名思無邪齋德有鄰堂而世爭以三字名堂宇公知前此固常有是是否答曰非獅子吼寺乎葉公笑曰是也蓋吳興城南射村有寺號獅子吼本錢氏賜名宋因之

案獅

子吼寺名起于三國諸志載之甚明舊聞所云錢氏賜名恐誤或云賜名乃賜額之誤

**國朝**凌誼鵲巢詩

梁棟非樹林胡然而巢此我欲問菩薩開口笑不止

聞說鵲最靈將無有微意惹得來往人仰首歎奇異  
吳晟遊獅子吼寺旁有廢圃相傳梁丞相故宅已不  
可攷慨焉賦此

聞說昔年觴詠地而今寂寞但荒墟殘階碑斷語  
亂敗瓦苔深鐘磬虛幾樹古松丞相植一圍廢圃老  
僧鋤南朝壯麗俱銷歇不獨飄零是故居

### 開化道院

在射村晉永嘉元年孫德宗捨宅建唐會昌中廢周  
廣順三年錢氏重建號菩提寺宋治平二年改開化  
明萬厯閒道士少瀛建酒隱亭於東偏 國朝乾隆  
初道士朱奇巖建張仙閣于後丁未閒道士沈一炳

### 寶五

二

重脩嘉慶閒道士費陽得募脩澹泊境諸殿

國朝劉舜俞上巳日開化院觀賽神詩

散步尋遊歷小溪石橋閒坐聽鳴鷗晴空雨過千紅  
亂小閣簾開萬綠齊觀楔羽觴來野殿賽神仙樂徹  
芳堤風光處處堪憑眺況復邊陲靜鼓鼙自註楚中  
用兵方罷

### 鹿苑寺

在射村梁大同元年處士夏玠捨宅建相傳夏玠係  
蕭梁時相國

子今無攷唐大厯閒僧明誓重建賜名永興寺顏真卿篆

額宋治平二年改今名隆興元年僧元偁重修元至  
大閒費世奩等重建明成化癸卯吳安重建崇正四  
年吳時亮重脩 國朝乾隆閒僧秋崖重脩大殿

唐永興寺碑記元和五年進士吳行周撰

唐永興寺僧伽和尚碑裴 撰

唐永興寺宴道碑沙門簡章述

以上三碑載在府縣志今無

元宇文公諒重修鹿苑寺碑記

能仁氏以根器緣業肇開羣昏放則彌滿六合卷則不離方寸苟得其人道固在是吳興歸安縣東南四十里餘曰寶溪梁永興寺在焉大同初處士夏玠捨宅所建中更廢壞唐大厯中承詔重立宋治平改賜今額淳熙間僧如肅一新之往記概可徵也燬于至大庚戌之歲里長費世屋首建圓通秘殿繼割腴田

寶五

三

以豐廩給贈湖州路判官陳炎妻恭人姚吳謙妻馬爰立大殿仍割腴田以給眾也厥後堂室庖漏相次完具今聚而藏脩者幾四百指主僧處賢述本末求文刻石以貽永久信乎道在其人鹿苑流風宜勿替而後振也凡檀越所施田畝則詳碑陰茲不書辭曰天目盤盤清苕發源瀉爲奔湍舒爲長川折行東迤林壑妍靡虬光夜起珠藏澤媚言言崇崇法王之宮鉦鏜鼓鐘梵音颯颯雨暘若時物不癘疵優曇敷蕤永祝皇釐

明張濂重建鹿苑寺碑記

射村鹿苑寺去歸安縣治東南四十里許按郡誌其

地爲寶溪寺之始處士夏玠者捨宅建于梁之大同  
時初名永興唐代宗大厯閒奉詔重建又七百餘年  
宋英宗更賜今名逮孝宗時僧如肅一新之隨又火  
于元武宗之世時里有善士費世屋吳謙碑作兼湖州  
路判官陳炎相繼興復各割腴田以給眾僧至國朝  
成化癸卯殆一百餘年梁木傾圯前邱里義士吳仲  
祥暨冢嗣宗益首蓋天王殿于前繼蓋觀音殿于後  
惟中闕大佛殿西疇耕隱吳君宗義亦仲祥子也于  
善事尤素所樂爲遂出白金二百兩爲倡寺僧恩智  
率諸同人令各出所蓄不數月閒繕脩告備高深宏  
敞視昔有加兼以甃鏤孔堅雕飾畢致旛幢鐘鼓百

寶五

四

爾中規落成之後宗義公之仲子散官吳璋字汝敬  
者懼世久無傳爰徵文刻石以垂不朽於是乎記

國朝陸彥威鹿苑文杏詩

梵宇森森清晝長一株文杏伴空王綠陰漲院客來  
滿黃葉堆簷僧掃忙宿霧半開朝爽襲午煙初散夕  
霏涼不知種樹人何在況是當年歌舞場

吳景鄮詩并序

偕友人讀書鹿苑寺寺在射村東南相傳地有五相

國第案五第爲尚書右僕射何桌尙書寶謨閣學士  
倪思太師魯國公孟珙少保左丞相葛邲其一

相傳爲梁丞相  
夏氏今無攷今皆屬之梵宇此則蕭梁時夏丞相

宅後世捨爲寺余先世亦居射村訪其故址邈不可

得慨焉賦此

聞說南朝諸相國捨將地作梵王宮地蟠古木千年  
久門對平橋一水通空憶繁華如夢幻喜逢樽酒論  
文同欲尋桑梓知何處滿眼斜陽煙草叢

吳晟佛生上人招飲鹿苑寺之竹林堂座恰七人歸  
而賦此

禪院能招客相攜泛寶溪地遺麋鹿跡人恰竹林齊  
霜樹秋霞斷晴空晚岫低箭潭歸路近舟緩不驚鷺

附鹿苑古井

在寺旁不知鑿自何代上窄下寬數丈味甘美大旱  
水不涸故老相傳為歸安闔邑第一大井

寶五

五

東嶽行宮

在射村宋宣和中建元燬明景泰間吳宗益建

按湖州府

李志作正統八年重建 國朝康熙間吳時亮重建

殿前有古松一株宋時植

也虬枝盤空蒼翠一團里人稱東嶽喬松列入勝景

明范吉東嶽行宮碑記

東嶽行祠在吳興郡南四十里之寶溪以山明水秀  
地勝人殷故祠焉廢弛既久遺像賴淨心丁頭陀苦  
蔽尚存正統閒郡判謀移礫石惟時詔旌義民清溪  
蓮隱吳君宗益以萬石長在官懇陳得免景泰改元  
蓮隱罷役歸與淨心日相圖度鳩工聚材鼎建正殿  
以崇嶽靈寢殿以奉太乙其東則五嶽地藏其西則

十王左右司門廡臺榭經始於景泰辛未備成于天  
順壬午神不威而氣肅眾不勞而事舉于是里人僉  
曰神宇重新宜立言以詒不朽介蘇郡陳某請余文  
余惟岱嶽之神之德其盛矣乎體備元仁鈎持洪造  
陰翊王度協佑民生漢唐迄宋累行封禪其宏濟神  
化茂昭祀典今蓮隱捐巨萬之資力成悠久河岳以  
奠海宇以甯其昌大耋艾之休有不萃于蓮隱乎于  
是乎記

顧應祥東嶽行宮重建檀越吳公祠記

惟岱山之神自昔爲重至宋褒以天齊崇以帝號凡  
東土要會之處必嚴廟貌以肅神威歸安寶溪舊有

寶五

六

行祠瓦落僅存其像里有吳氏種德翁疏財仗義正  
統間助有司賑朝廷旌之嘗脩鹿苑寺獅子吼寺猶  
不忍鄉之火葬者捨地爲義冢旣又相度嶽祠未就  
而卒其子蓮隱宗益洎西疇宗義之子安素璋共成  
翁志從而新之琳宮峻起紺宇森列百爾葺構罔弗  
壯麗自景泰辛未至天順壬午越十年始成厥後安  
素之子南太僕西園龍復甃石護塘以防水齧自是  
嶽降維甯民生攸賴皆吳氏之世德也初蓮隱物故  
首僧誠謀諸徒云凡有盛德者自獲天庥檀那吳氏  
傾不貲之費功及幽明德莫厚焉在若等獲居茲土  
烏可忘其所自耶爰奉種德以下諸神位于便室而

故僧之主亦側其間西園自滌歸謁嫌其混雜神或不妥而住持釋永華乃別建祠于嶽殿之左爲楹凡四顏曰檀越吳公祠華慮久而或湮來乞予文將紀諸石余與西園爲姻家且重其世愷孝義故不辭書以歸之

吳世淳東嶽喬松詩

橫枝夭矯似游龍颯颯濤聲雜梵鐘分得泰山雲一片可知此樹薄秦封

聖壽院

在射村東南俗呼東聖堂明景泰間吳宗義勅建初公奉眞武甚虔一夕夢有金光百道集于泛金橋之

寶五

七

西明旦掘其地得半截碑乃眞武像上勒神咒傍有政和年號遂卽其地祠焉碑尙存

明魏驥聖壽院記

明興祀典獨隆眞武而眞武于國朝亦最奇應上皇之北狩也耕隱吳公以世受國恩泣奮曰漢卜大夫以布衣輸財出力佐縣官急而吾家蒙璽書旌閭者再忍居卜大夫後乎遂輸粟若干石于邊大司馬于公謙聞之朝欲爵公公曰吾誼不後君吾甯乞榮者耶于公欲迫之公弗聽于是賜公承事郎罷歸時里有眞武像公朝夕號曰文皇帝起北平神甲冑晝見上皇非文皇帝裔耶狩以北又神所轄地幸獲駕南

轅願益置地廣真武宮迨明年秋虜果奉上皇還京  
公稽首曰真武其我應哉出橐金若干置地八畝于  
泛金橋西地最勝鳩工聚材不旬月堂寢翼然筮良  
日奉真武像里有祈禳輒應鄉老樂之誦吳公誼謁  
予碑焉嗚呼吳公猶草莽臣于君臣閒抑何勤也以  
先世累旌而好義益勤其精爽通于真武禱輒應功  
在社稷名在里閭辭位而尊不爵而榮千秋萬紀與  
國俱存者八畝之宮乎彼肉食而身謀不再傳而堂  
構蔑如視八畝宮何如也或曰固也第我國家奉真  
武侈矣元都白嶽之勝甲于宇內碧霄紺宇金宮玉  
墀殆秦漢所未覩而吳公顧八畝宮乞靈真武不亦

寶五

八

隘乎予曰不然有盡者形不朽者神崑崙之島王母  
之墟終一盡耳疇顯疇幽疇鉅疇微迺真武往矣而  
充周寥廓飽滿萬有者非其神耶吳公誠于報國精  
積而神固足符聖諦又何論乎有盡之形鄉老曰善  
是足妥真武慰吳公矣勒諸七尺之石

三官殿

在射村東南未詳劫自何代 國朝初廢乾隆閒觀  
察曹繩柱重建

內有古銅三官聖像縣令某燬之觀察蒞湖夢三神  
來謁遂建前後兩殿復奉神像如初

蓮隱庵

俗呼隱居庵

在前邱南明吳宗益建 國朝嘉慶二年嗣孫吳名

新督工重脩

**明翁經**

烏程縣知縣天順  
間任列入名宦

詩

物外閒遊自笑癡幾年職任愧操持吳君高節蓮庵  
隱縣令無才飯鶴遲玉版摘來留客後黃金散盡賑  
民時夕陽一片虬松影正是飛鴉欲上枝

積善庵

在前邱東塢

淨戒庵

在前邱明里人丁某刵建 國朝康熙閒重脩

蟠龍庵

寶五

九

在寶溪下庄涇

保寧庵

在前邱明里人施某捨宅建萬厯閒吳世濟重脩

法華庵

在前邱東塢明萬厯庚戌僧道正建崇正壬申吳時  
亮重建

**國朝**吳繼祖詩

禪關盡日絕塵氛流水斜橋此地分虛室一燈窺佛  
性法華半畝現慈雲南涼樹色煙中隱北墅梅香鐘  
後聞偶向蒲團參色相不嫌方外說空文

永慶禪院

在北涼山

詳涼山別墅

寂照庵

在射村宋紹興閒僧性海勅建元至正閒重建

案府志

作西寂照庵

**明唐應徵**世守田土記

郡南四十五里曰寶溪溪流清澈地勢盤曲有庵曰寂照宋禪師性海建後經兵燹遂成瓦礫迨元至正閒僧善繼祖庭重新洪武初有姓王氏號西翠祖庭之徒也克守舊規聿增厥土西翠而下有鍾氏竹隱王氏環翠繼之今若田若地若蕩若山總其畝四千有奇西翠嘗言曰僧凡自置常住田法不許售蓋遵

寶五

十

太祖高皇帝舊制故惓惓焉今主席任氏名行洪遠其字號聽竹以義補官復構大士殿因思昔日勅造之艱來乞余記余惟興廢無常一係乎人寂照自宋迄今距三百餘年有性海創之于始祖庭興之于後西翠環翠聽竹繼之于焉不廢今爲聽竹之徒曰道理曰道定曰費謙曰沈城曰楊琦者能無以前人之心爲心世守勿替也哉若夫西翠之遺言田土之數計則刻之碑陰

**國朝**吳晟讀書寂照庵詩

水落風霜冷林臯接遠嵐酒能供客醉詩每向僧談野曠無人至溪清有鳥探莫言孤寂甚明月在庭南

梵音庵

在前溪倭返橋北明嘉靖閒建爲拒倭之舍後捨爲  
佛院

長生田碑記

前邱之東有倭返橋橋之北有前後三楹明季爲拒  
倭之舍至今猶呼爲舍頭村吾族祖西園公諱龍特  
建焉後捨爲佛院名梵音越明至 國朝歷有興廢  
凡持住茲院者皆不匝歲謂其無恆產也余患院無  
持住將日頽無復振遂割院之東北虧五圩東南三  
號田若干畝以給守院之繕庶荒廢舊址不致日就  
銷亡院後接竹墩以溪閒之里人置船引繩以渡常

寶五

十一

患繩之時斷而鮮續也余並命守院者以稟結繩斷  
者續絕者繼鄉老咸謂一舉而兩得喜相告也余惟  
恐他日有變遷棄就之虞因書其事以勒之石田畝  
數計則刻之碑陰嘉慶二年丁巳六月十日吳玉樹  
撰